

11 SEP 1999

KONGRES-BUMIPUTERA

TIGA TERAS UTAMA DIKENALPASTI UNTUK PERSIAPKAN BUMIPUTERA KE ALAF BARU

KUALA LUMPUR, 11 Sept (Bernama) -- Tumpuan kepada "K-Economy" atau "knowledge-economy," penyusunan semula institusi dan agensi kerajaan dan penerapan budaya yang sesuai merupakan tiga teras utama yang dikenalpasti penting untuk kaum Bumiputera mempersiapkan diri mereka menjelang alaf baru, kata Menteri Pembangunan Usahawan Datuk Mustapa Mohamed, hari ini.

Tiga isu tersebut amat penting buat masa ini kepada Bumiputera untuk melengkapkan diri mereka menghadapi alaf baru berbanding dengan penubuhan institusi Bumiputera seperti Bank Bumiputra Bhd dan Instituti Teknologi Mara yang menepati keperluan Bumiputera pada masa dahulu, katanya kepada pemberita di akhir Kongres Ekonomi Bumiputera Keempat di sini.

Kongres dua hari itu dianjurkan bersama oleh Kementerian Pembangunan Usahawan dan Dewan Perniagaan Melayu Malaysia (DPMM).

Mustapa berkata isu globalisasi telah juga dibangkitkan pada kongres kali ini.

Sementara itu, presiden DPMM Tan Sri Tajudin Ramli berkata penyusunan semula agensi atau institusi kerajaan yang kurang berfungsi tidak bermakna ia akan dimansuh atau ditutup tetapi sekadar menyusun semula fungsi, tumpuan dan proses penyampaian badan-badan itu kepada perkembangan semasa.

Ditanya mengenai resolusi yang dicadangkan kongres itu supaya dicantumkan Kementerian Pendidikan dengan Kementerian Sumber Manusia, Tajudin berkata: "Itu sebahagian daripada resolusi kita memandangkan ia bersangkutan dengan pendidikan sepanjang hayat.

Tajudin mendapati kebanyakan sumber manusia di Malaysia menerima latihan dan pendidikan secara formal hanya satu pertiga daripada jangka hayat mereka.

Jangka hayat seorang wanita di Malaysia ialah 73 tahun sementara untuk lelaki ialah 71 tahun, di mana kebanyakan mereka tamat proses pembelajaran rasmi apabila mereka menghabiskan pengajian di peringkat universiti dalam lingkungan usia di antara 23 hingga 25 tahun, katanya.

Tajudin berkata: "Tiada tindakan susulan, walhal dalam K-Economy, masyarakat berpengetahuan ini memerlukan peningkatan pengetahuan sepanjang hayat, oleh itu kita cadangkan supaya tindakan susulan dilaksanakan menerusi penyusunan semula institusi kerajaan."

Mustapa pula berkata isu-isu budaya yang ditekankan oleh Perdana Menteri Datuk Seri Dr Mahathir Mohamad mengenai tiada jalan pintas untuk mencapai kejayaan harus diterapkan untuk memastikan Bumiputera dapat mara ke hadapan.

Beliau berkata berdasarkan pemerhatian kementeriannya dan DPMM, kongres kali ini amat berjaya sekali dari segi penyertaannya, komitmennya dan juga dari segi mutu perbahasan di mana kesungguhan para peserta dapat dilihat.

Mustapa berpendapat golongan Bumiputera dalam keadaan kegawatan sekarang ingin mendapat sedikit jaminan kerajaan bahawa mereka akan dapat pembelaan.

"Kerajaan akan membantu di mana perlu untuk memastikan Bumiputera mencapai tahap kejayaan yang boleh kita banggakan," katanya.

-- BERNAMA

MK MA